

# GCSE



TREOIR DO MHÚINTEOIRÍ  
GCSE CCEA

## Stair

Aonad 2:  
Caidrimh Idirnáisiúnta, 1945–2003

**Paca Acmhainní:**  
Ionsaithe 11 Meán Fómhair



# Caidrimh Idirnáisiúnta, 1945–2003

## Réamhrá don Phaca Acmhainní

Forbraíodh an paca seo le tacú le teagasc agus foghlaim '*Caidrimh Idirnáisiúnta, 1945 – 2003*', agus go háirithe, ábhar atá sa rogha seo den chéad uair – '*Fáthanna le hionsaithe 11 Meán Fómhair, freagairt SAM agus a chomhghuaillithe, agus an cogadh in éadan na sceimhlitheoireachta*'. Is é inneachar na sonraíochta don ábhar seo:

<b>Teacht chun cinn teannas nua, 1991-2003</b>	<b>Fáthanna le hionsaithe 11 Meán Fómhair Freagairt SAM agus a chomhghuaillithe, agus 'an cogadh in éadan na sceimhlitheoireachta'</b>
--	--

Tá roinn '*treoir do mhúinteoirí*' ann do gach gníomhaíocht, le cois '*treoracha do dbaltaí*'. Cuirtear faisnéis achomair chúlra gach gníomhaíochta ar fáil fosta. Cuireann gach gníomhaíocht deiseanna ar fáil riachtanais reachtúla scileanna Churaclam Thuaisceart Éireann ag Eochairchéim 4 a fhorbairt le cois na scileanna a mbeifear ag súil go léireoidh daltaí sa scrúdú don rogha seo:

- eolas agus tuiscint a léiriú ar phríomhghnéithe agus ar phríomhthréithe na tréimhse a ndearnadh staidéar uirthi (CM1);
- imeachtaí stairiúla agus tréimhsí stairiúla a ndearnadh staidéar orthu a mhíniú agus anailís a dhéanamh orthu ag baint úsáid as coincheapa stairiúla den dara hord, lena n-áirítear leanúnachas, athrú, cúis, iarmhairt, tábhacht, cosúlacht agus éagsúlacht (CM2);
- anailís a dhéanamh ar fhoinsí (i gcomhaimsir leis an tréimhse), iad a mheas agus úsáid a bhaint astu le breithiúnais a bhfuil bunús leo a thabhairt, i gcomhthéacs imeachtaí stairiúla a ndearnadh staidéar orthu (CM3); agus
- anailís a dhéanamh ar léirmhínte, iad a luacháil agus breithiúnais a bhfuil bunús leo a thabhairt (lena n-áirítear cad é an dóigh agus cad chuige a mbeadh difear idir léirmhínte) i gcomhthéacs imeachtaí stairiúla a ndearnadh staidéar orthu (CM4).

## Cúlra an ábhair

Ba am cinniúnach i dteacht chun cinn an 'chogaidh in éadan na sceimhlitheoireachta' agus a thionchar ar chaidrimh idirnáisiúnta ina dhiaidh sin na hionsaithe ar an Ionad Trádála Domhanda i Nua Eabhrac ar 11 Meán Fómhair 2001.

Idir 8 agus 9 a.m. an mhaidín sin, fuadaíodh ceithre heitilt paisinéara in oirthuaisceart SAM. Tuairteáladh beirt de na heitleáin seo ar na Túir Chúplacha den Ionad Trádála Domhanda i Nua Eabhrac agus tuairteáladh an tríú ceann isteach ar an *Pentagon in Washington D.C.* Tugadh an ceathrú heitleán chun talaimh in Pennsylvania i ndiaidh streachailte idir fuadaitheoirí agus paisinéirí.

San iomlán, mharaigh na 19 bhfuadaitheoir amach is isteach ar 3,000 duine. An lá arna mhárach, d'fhógair Uachtarán SA, George W. Bush, go raibh SAM i gcogadh in éadan na sceimhlitheoireachta.

# Gníomhaíocht a hAon

**Teideal: Fáthanna le hIonsaithe 11 Meán Fómhair**

**Príomhcheist: Cad chuige ar ionsaíodh SAM ar 11 Meán Fómhair 2001?**

## **Treoracha do Dhaltaí**

- \* Tabharfar eolas duit a bhaineann le príomhfhátanna le hionsaithe 11 Meán Fómhair. Léigh an t-eolas go cúramach agus cuir na cártaí in ord croineolaíoch.
- \* Déan nótaí suimitheacha ar theimpléad Roth na nIarmhairtí nó ar theimpléad Tábla na nIarmhairtí a thug do mhúinteoir duit.
- \* Bain úsáid as na nótaí a rinne tú le píosa scríbhneoireacht shínte a chur i gcrích ar an ábhar seo, ag baint úsáid as an fhráma scríbhneoireachta atá curtha ar fáil.
- \* Lean treoracha do mhúinteora le tábhacht dhá fháth le hionsaithe 11 Meán Fómhair a mhíniú.

## **Treoir do Mhúinteoirí**

- \* Tabhair bileoga eolais do na daltaí ar fhátanna le hionsaithe 11 Meán Fómhair. Is féidir iad seo a ghearradh amach ar bhonn aonair (Teimpléad A).
- \* Dáil amach iad, ceann i ndiaidh an chinn eile le gur féidir le daltaí an fhaisnéis a phlé agus nótaí a dhéanamh ar gach cúis. D'fhéadfaí fosta an ghníomhaíocht seo a chur i gcrích mar chuid de ghníomhaíocht Timpealláin (Teimpléad B).
- \* Baineann daltaí úsáid as Roth nó Tábla Iarmhairtí le hachóimre a dhéanamh ar shonraí in ord croineolaíoch (Teimpléad C).
- \* Bain úsáid as fráma scríbhneoireachta le cuidiú le daltaí píosa scríbhneoireacht shínte ar an ábhar a chur i gcrích (Teimpléad D).
- \* Iarr ar dhaltaí dhá fháth le hionsaithe 11 Meán Fómhair a phlé agus ansin a dtábhacht a mhíniú (Teimpléad E).

# Gníomhaíocht a hAon

## Teimpléad A – Fáthanna le hIonsaithe 11 Meán Fómhair

### **Cogadh na hAfganastáine, 1979-89**

Rinne na Sóivéadaigh ionradh ar an Afganastáin sa bhliain 1979 le rialtas a bhí báúil leis na Sóivéadaigh a chur i réim. Tharla an eachtra seo le linn an Chogaidh Fhuair agus chuaigh an caidreamh idir APSS agus SAM in olcas dá thairbhe. Mar fhreagairt ar ionradh na Sóivéadach, chuir SAM, faoi Ronald Reagan, airgead chuig an Mujahideen in Afganastáin, a bhí ag troid in éadan trúpaí na Sóivéadacha. Tháinig Moslamaigh ó thíortha eile le tacú leis an Mujahideen. D'fhág Osama bin Laden a bhaile san Araib Shádach le troid in éadan na Sóivéadach in Afganastáin san am sin. D'amharc na trodaithe seo ar an chogadh mar 'jihad' nó 'chogadh naofa' agus bhí eagla orthu go raibh Ioslam faoi bhagairt sa réigiún.

### **An Cogadh idir an Iaráin agus an Iaráic 1980–88**

San Iaráin, sa bhliain 1979, cuireadh an ceannaire, a dtugtaí an Shah air, as cumhacht agus cuireadh an Ayahtollah Khomeini, Moslamach radacach Siach (Shi'ite), ina áit. Chuir sé rialtas Ioslamach ar bun sa tír. Bhí tionchar ollmhór aige seo ar an Mheánoirthear, ach go háirithe ar an Iaráic. Bhí an Iaráic faoi riail Saddam Hussein agus an Pháirtí Ba'ath, ar Moslamaigh Shunnaíocha iad (cé gur Shi'ite 60% den daonra). Rinne an Iaráic ionradh ar an Iaráin sa bhliain 1980 agus mhair an cogadh ocht mbliana, ach níor bhain taobh ar bith. Fágadh fiacha ollmhóra ar an Iaráic – bhí \$14 billiún ag Cuáit amháin uirthi. Le haisiúc an airgid seo a sheachaint, rinne an Iaráic, faoi cheannaireacht Saddam Hussein, ionradh ar Cuáit ar 2 Lúnasa 1990.

### **Oibríocht Desert Shield, Lúnasa 1990**

Bhí Uachtarán SA, George H. Bush, inníoch faoi fhorghabháil Cuáit ag Saddam Hussein, nó bhí SAM ag brath go mór ar sholáthairtí ola ó réigiún an Mheánoirthir, go háirithe an Araib Shádach. Ba é an eagla a bhí ar an Uachtarán Bush go ndéanfadh Saddam Hussein ionradh ar an Araib Shádach. Mar sin de, d'iarr sé cead ar an rialtas Shádach trúpaí SA a chur ansin le hiad a chosaint. Ghlac na Sádaigh leis agus thosaigh SAM ar Oibríocht Desert Shield ar 7 Lúnasa 1990.

### **Al-Qaeda**

Sa bhliain 1988-89, chruthaigh Osama bin Laden an eagraíocht, a dtugtaí Al-Qaeda uirthi. Ba é an aidhm a bhí acu Ioslam a chosaint ar fud an domhain. Bhí fuath ag Al-Qaeda ar luachanna Meiriceánacha. Sa bhliain 1990, thairg bin Laden a arm do na Sádaigh le hiad a chosaint ar ionradh fhéideartha ón Iaráic. Nuair a ghlac na Sádaigh le cuidiú ó SAM ina áit sin, bhí bin Laden ar buile. Ba mhian leis pionós a chur ar SAM as an tír naofa Ioslamach, an Araib Shádach, a mhaslú.

Ba é aidhm Al-Qaeda rialtais sa Mheánoirthear agus sa domhan Mhoslamach, nach gcuireann riail docht reiligiúnach a chur i bhfeidhm, a chur as cumhacht. Ba mhian le Al-Qaeda deireadh a chur le tionchar SA sna tíortha seo, agus riail Ioslamach a leathadh. Chreid bin Laden gurbh fhéidir úsáid a bhaint as beartaíocht sceimhlitheoireachta sa chogadh seo in éadan an Iarthair – má bhí marú sibhialtach féin i gceist leis seo.

### **Oibríocht Desert Storm, 1991**

Tosaíodh air seo ar 24 Feabhra 1991, nuair a shocraigh SAM agus comhghuaillíocht 50 tír Cuáit a shaoradh ó smacht na hIaráice. Chuir siad seo i gcrích faoi 28 Feabhra. Chinn an tUachtarán Bush, áfach, gan ionradh a dhéanamh ar an Iaráic ná Saddam Hussein a chur as cumhacht, ar eagla nach mbeadh SAM in ann rialtas seasmhach a bhunú san Iaráic. Ina áit sin, lonnigh an tUachtarán Bush 5,000 trúpaí san Araib Shádach le tacú le 'limistéar faoi chosc eitilte' thar dheisceart na hIaráice.

### **Ionsaí ar an Ionad Trádála Domhanda, 1993**

Phléasc ball d'Al-Qaeda, Ramzi Yousef, buama trucaile 1,500 punta i gcarrchlós túir thuaidh an Ionad Trádála Domhanda. Bhí sé ag iarraidh na Túir Chúplacha a scrios, agus, cé gur theip air seo a dhéanamh, mharaigh sé 6 dhuine agus ghortaigh sé 1042 eile. Bhí Al-Qaeda ag taispeáint go raibh siad ag cur pionóis ar SAM mar gheall ar a gcur isteach sa Mheánoirthear le gairid.

### **1996 Téann an Talaban i gceannas na hAfganastáine, 1998, Fógraíonn Al-Qaeda Cogadh agus ionsaithe ar Ambasáidí SA san Afraic**

Ba ghrúpa radacacha Ioslamach an Talaban, a bhí mar chuid d'fhórsaí an Mujahideen a throid in éadan na Sóivéadach sa chogadh san Afganastáin. Bhunaigh siad stát Ioslamach ansin. Ansin, thaistil bin Laden ar ais chun na hAfganastáine lena lucht tacaíochta in Al-Qaeda. D'eisigh sé 'Fógairt Cogaidh' in éadan SAM agus a chomhghuaillithe ar 23 Feabhra 1998. Go gearr ina dhiaidh sin, rinne Al-Qaeda ionsaithe in éadan SAM. Ar 7 Lúnasa 1998, buamáladh Ambasáidí SA sa Chéinia agus sa Tansáin agus maraíodh thar 200 duine agus gortaíodh amach is isteach ar 4,000. Mar fhreagairt, rinne SAM ionsaithe ar an Afganastáin agus ar an tSúdáin agus, i Mí na Samhna, chúisigh Ard-Ghiúiré SA Osama bin Laden as a bheith freagrach as na hionsaithe ar Ambasáidí SA san Afraic.

### **Ionsaí 2000 ar USS Cole, Éimin**

D'ionsaigh líonra de chuid Al-Qaeda an long chabhlaigh SA '*USS Cole*' amach ó chósta Éimin. Maraíodh 17 mairnéalach Meiriceánach. San am sin, bhí ceannaire Al-Qaeda, Khalid Sheikh Mohammad agus daoine eile ag pleanáil ionsaithe 11 Meán Fómhair cheana féin.

## Gníomhaíocht a hAon

Teimpléad B – Cad chuige ar ionsaíodh SAM ar 11 Meán Fómhair 2001?

Déan nótaí achomaire ar na himeachtaí atá ainmnithe sa tábla seo. Féach le trí phríomhphointe a chuimsiú do gach roinn.

Cogadh na hAfganastáine, 1979-89
An Cogadh idir an Iaráin agus an Iaráic, 1980–88
Oibríocht Desert Shield, Lúnasa 1990
Al-Qaeda, 1988+
Oibríocht Desert Storm, 1991
Ionsaí ar an Ionad Trádála Domhanda, 1993
Imeachtaí, 1996-98
USS Cole, 2000

## Gníomhaíocht a hAon

Teimpléad D – Cad chuige ar ionsaíodh SAM ar 11 Meán Fómhair 2001?

Bain úsáid as an eolas atá cruinnithe agat le freagairt fhada ar an cheist thuas a scríobh.

### **Intreoir**

Ar maidin 11 Meán Fómhair 2001, fuadaíodh ceithre heitleán paisinéirí in oirthuaisceart SAM. Tuairteáladh beirt de na heitleáin seo ar na Túir Chúplacha den Ionad Trádála Domhanda i Nua Eabhrac ina dhiaidh sin agus tuairteáladh an tríú ceann isteach ar an Pentagon in Washington D.C., agus ceann eile os cionn Pennsylvania. Roinnt cúinsí ag oibriú i gcomhar ba chúis leis na hionsaithe seo.

### **Paragraf 1**

Chuaigh roinnt cúiseanna fadtéarmacha siar go dtí cogadh 1979-89 san Afganastáin...

---

---

---

---

---

---

---

---

---

---

### **Paragraf 2**

I dtrátha an ama seo, bhunaigh Osama bin Laden Al-Qaeda...

---

---

---

---

---

---

---

---

---

---






## Gníomhaíocht a hAon

### Teimpléad C – Roth Iarmhairtí: Cad chuige ar ionsaíodh SAM ar 11 Meán Fómhair 2001?

Déan cóip den Roth Iarmhairtí thíos agus déan nótaí achomaire ar na fáthanna le hionsaithe 11 Meán Fómhair



## Gníomhaíocht a hAon

### Teimpléad E – Cad chuige ar ionsaíodh SAM ar 11 Meán Fómhair 2001?

Roghnaigh dhá fháth a ndearnadh ionsaí ar SAM ar 11 Meán Fómhair agus i gcás gach fátha a roghnaíodh, mínigh a thábhacht mar chúis le hionsaithe 11 Meán Fómhair.

<b>Fáth</b>	<b>Tábhacht an fhátha</b>
<b>Rogha 1</b>	
<b>Rogha 2</b>	

## Gníomhaíocht a Dó

Teideal: Na Fáthanna le hIonsaithe 11 Meán Fómhair

Príomhcheist: Cad é a insíonn na foinsí dúinn faoi na fáthanna a ndearnadh ionsaí ar SAM ar 11 Meán Fómhair, 2001?

### Treoracha do Dhaltaí

- \* Léigh tríd na foinsí uilig agus déan nótaí orthu – breac síos smaointe ar bith a thiocfaidh isteach i do cheann, bunaithe ar an eolas atá agat ar an ábhar seo cheana féin.
- \* Pléigh na foinsí le do mhúinteoir agus leis an duine atá ina shuí in aice leat.
- \* Déan do bhealach tríd na ceisteanna, ceann i ndiaidh an chinn eile. Bí cinnte go n-iarrann tú ionchur nó cuidiú má bhíonn seo de dhíth ort.
- \* Críochnaigh gach freagairt scríofa. Tabhair a oiread mioneolais agus is féidir leat.

### Treoir do Mhúinteoirí

- \* Tabhair ábhar foinse do na daltaí. Tabhair am dóibh seo a léamh ar bhonn aonair ó thús. (Teimpléad A).
- \* Pléigh inneachar, údarthacht, lucht éisteachta, comhthéacs na foinse srl do Fhoinsí A, B agus C. Taispeáin foinsí go físiúil ar scáileán agus cuir nótaí thart orthu, ceann i ndiaidh an chinn eile.
- \* Iarr ar dhaltaí dul i gcomhairle le chéile nuair a bhíonn siad ag ullmhú freagairtí scríofa ar na ceisteanna (Teimpléad B).
- \* Cuidigh le daltaí a bhfuil cuidiú de dhíth orthu le linn chéim na scríbhneoireachta den ghníomhaíocht seo.
- \* Iarr ar dhaltaí, trí scrúdú a dhéanamh ar Fhoinsí A agus C, leanúnachas a chur san áireamh i dtaca le smaointe agus creidimh atá ag antoiscigh Ioslamacha thar dhá thréimhse.

# Gníomhaíocht a Dó

## Teimpléad A – Na fáthanna le hionsaithe 11 Meán Fómhair

Léigh na foinsí uilig agus ansin comhlánaigh na ceachtanna scríofa ina ndiaidh.

### Foinse A

Ó Sayyid Qutb, *Islam and the Problem of Civilisation* (Dar al-Shuruq, 1962). Curtha in oiriúint ó *The War on Terror*, David Downing, Franklin Watts, 2007.

“Cad é an breithiúnas ba chóir dúinn a thabhairt ar Chultúr bréige seo an Iarthair? Cad é ba chóir a dhéanamh faoi Mheiriceá agus faoin Iarthar, i bhfianaise chomh contúirteach agus atá siad don chine daonna? Nár chóir dúinn breith bháis a thabhairt? Nach é sin an breithiúnas is cuí don choir?”

### Faisnéis chúlra

Ba phríomhbhall Qutb den Bhráithreachas Mhoslamach, a bunaíodh san Éigipt sa bhliain 1928. Ba é an cuspóir a bhí aige sochaí na hÉigipte a dhéanamh níos Ioslamaí. Chreid Qutb agus a lucht leanúna go raibh cultúr an Iarthair truaillithe.

© 'The War onTerror - Timeline Series' le David Downing, Franklin Watts Publishers, 2008

### Foinse B

Ó theagasc Abdullah Azzam, ní fios cén dáta. Curtha in oiriúint ó *OCR Modern World History*, Ben Walsh, Hodder Education, 2009.

“A chomh-Mhoslamacha, is é 'Jihád' nó 'cogadh naofa' cuspóir bhur saoil... Iad siúd a shíleann gur féidir le reiligiún Allah an bua a fháil gan cogadh naofa nó gan cath ina n-éadan siúd sa domhan Thiar nach bhfuil reiligiún ar bith acu agus gan foréigean, tá siad ag cur dallamullóg orthu féin. Ní thuigeann siad gnéithe fíora an reiligiúin Ioslamaigh.”

### Faisnéis chúlra

Ba mhúinteoir Palaistíneach Azzam, a bhunaigh eagraíocht sa Phacastáin (i ndiaidh ionradh na Sóivéidí ar an Afganastáin) sa bhliain 1979, a raibh sé mar aidiún aici saighdiúirí Moslamacha a earcú. In éineacht le Osama bin Laden, chuidigh Azzam Al-Qaeda a chruthú mar arm Moslamach ar fud an domhain.

© 'OCR GCSE Modern World History' le Ben Walsh, Hodder Education, 2009

### Foinse C

Ó ráiteas de chuid Osama bin Laden, Feabhra 1998. Curtha in oiriúint ó *OCR Modern World History*, Ben Walsh, Hodder Education, 2009.

“Tá an bhreith na Meiriceánaigh agus a gcomhghuaillithe a mharú – idir shibhialtaigh agus an t-arm – mar dhualgas ar gach Moslamach a dtig leis a dhéanamh i dtír ar bith inar féidir a dhéanamh... Is é seo an rud a theagascann Allah Uilechumhachtach dúinn, troidfimid in éadan na bpágánach le chéile mar throideann siadsan i bhur n-éadan le chéile agus troidfimid ina n-éadan go dtí go mbíonn deireadh le trioblóid uathu.”

### Faisnéis chúlra

Ba mhac é Osama bin Laden, do fhear shaibhir ón Araib Shádach a raibh comblacht tógála aige. Throid sé taobh leis an Mujabideen le linn chogadh na hAfganastáine, 1979–89. Chuidigh sé le Al-Qaeda a chruthú ina dhiaidh sin. Bhí bin Laden in ainm a bheith ar dhuine de na máistir pheanálaíthe a d'eagraigh na hionsaithe ar SAM ar 11 Meán Fómhair 2001.

© 'OCR GCSE Modern World History' le Ben Walsh, Hodder Education, 2009



Anois, taispeáin dhá dhóigh a bhfuil **difríocht** idir Foinse B agus Foinse C.

	Foinse B	Foinse C	Nótaí achomaire
<b>Difríocht 1</b>			
<b>Difríocht 2</b>			

3. I bhfoinse A, tá Sayyid Qutb ag caint sa bhliain 1962, ach i bhFoinse C, tá Osama bin Laden ag caint sa bhliain 1998.

Scríobh dhá shampla sa tábla a léiríonn leanúnachas sna creidimh atá ag antoiscigh Ioslamacha idir 1962 agus 1998:

	Foinse A	Foinse C	Míniú ar leanúnachas (i do fhocail féin)
<b>Sampla 1 de leanúnachas</b>			
<b>Sampla 2 de leanúnachas</b>			

## **Gníomhaíocht a trí**

**Teideal:** Freagairt SAM agus a chomhghuailithe ar ionsaithe 11 Meán Fómhair

**Príomhcheist:** Cad é mar a d'fhreagair SAM agus a chomhghuailithe ar ionsaithe 11 Meán Fómhair?

### **Treoracha do Dhaltaí**

- \* Léigh tríd an dá fhoirse agus déan nótaí orthu – breac smaointe ar bith a thiocfaidh isteach i do cheann, bunaithe ar an eolas atá agat ar an ábhar seo cheana féin.
- \* Pléigh na foinsí le comhpháirtí nó i ngrúpaí beaga.
- \* Freagair gach ceist agus tabhair a oiread mionsonraí agus is féidir leat.

### **Treoir do Mhúinteoirí**

- \* Tabhair ábhar foirse do na daltaí. Tabhair am dóibh staidéar a dhéanamh ar na foinsí ar bhonn aonair ó thús.
- \* Pléigh inneachar, údarthacht, lucht éisteachta, comhthéacs srl do Fhoinsí A, agus B. Méadaigh na foinsí agus taispeáin iad sa dóigh is gur féidir iad a anótáil.
- \* Tabhair deis do dhaltaí a smaointe a phlé/a bhfreagraí scríofa ar na ceisteanna a phleanáil.



## Gníomhaíocht a Trí

Teimpléad A – Cérbh é freagairt SAM agus a chomhghuaillithe ar ionsaithe 11 Meán

Fómhair?

Déan staidéar ar na foinsí thíos agus comhlánaigh an ceacht scríofa ina dhiaidh:

### Foinse A

**Athfhriotail ó *The War on Terror*, David Downing, Franklin Watts, 2007.**

“Ar 12 Meán Fómhair, chuir George W. Bush an freagra ar fáil: bhí SAM i gcogadh leis an sceimhlitheoireacht. Dhá lá ina dhiaidh sin, rith Comhdháil na SA Údarú Úsáid a Bhaint as Neart Míleata a thug ceart dlíthiúil don Uachtarán Bush úsáid a bhaint as 'gach neart cuí agus riachtanach' in éadan na namhad nua seo. Ar 21 Meán Fómhair, d'éiligh sé go ndéarfadh gach rialtas ar an domhan cad é an taobh a raibh siad air.

© 'The War on Terror - Timeline Series' le David Downing, Franklin Watts Publishers, 2008

### Foinse B

**Eagarthóir Jean-Marie Colombani ag scríobh sa nuachtán *Le Monde*, an Fhrainc, 12 Meán Fómhair, 2001. Curtha in oiriúint ó *The War on Terror*, David Downing, Franklin Watts, 2007.**

“Sa nóiméad tragóideach seo, nuair nach leor caint lena chur in iúl an t-uafás a mhothaíonn daoine, is é seo an chéad rud a thig isteach inár gceann: Is Meiriceánaigh uilig muid!...

Leoga, díreach mar a bhí sna huaireanta is léanmhaire inár stair féin, cad é mar thiocfadh linn a mhothú nach gcaithfimid seasamh leis na daoine sin, leis an tír sin, na Stáit Aontaithe, a bhfuil muid chomh mór sin leo agus a bhfuil muid a oiread sin i bhfiacha leo ar son ár saoirse?”

© 'The War on Terror - Timeline Series' le David Downing, Franklin Watts Publishers, 2008





## Gníomhaíocht a Ceathair

Teideal: Ionsaithe 11 Meán Fómhair agus a n-iarmhairtí

Príomhcheist: Cérbh iad iarmhairtí ionsaithe 11 Meán Fómhair go dtí deireadh na bliana 2001?

### Treoracha do Dhaltáí

- \* Léigh tríd na cártaí iarmhairtí uile a thugtar duit.
- \* Oibrigh le daltaí i do ghrúpa leis an ord chróineolaíoch ina nochtfaí na cártaí seo a phlé. Aontaigh ar an ord deiridh i do ghrúpa.
- \* Socraigh cad iad na cártaí ba chóir a bheith faoin teideal iarmhairtí láithreacha agus cad iad na cinn ba chóir a bheith faoin teideal iarmhairtí gearrthéarmacha. Luaitear dhá iarmhairt níos fadtéarmaí fosta.
- \* Aon uair amháin a bheidh a n-ord pléite ag gach grúpa, scríobh an t-eolas isteach san amlíne a thugann do mhúinteoir duit.
- \* Anois, roghnaigh iarmhairt amháin ionsaithe 11 Meán Fómhair agus mínigh cad chuige a síleann tú gurbh í ba thábhachtaí.
- \* Trí bheith rannpháirteach i ndíospóireacht ranga uile agus trí theimpléad an cheistneora ar 'thábhacht' a chomhlánú, déan measúnú ar thábhacht imeachtaí 11 Meán Fómhair i dtaca le caidrimh idirnáisiúnta de.

### Treoir do Mhúinteoirí

- \* Gearr amach tacar cártaí iarmhairtí agus tabhair do na daltaí iad (Teimpléad A). Níor chóir dóibh seo a bheith in ord chróineolaíoch, mar atá siad faoi láthair ar bhileog an teimpléid ina dhiaidh seo.
- \* Agus iad ag obair i ngrúpaí beaga, ba chóir do na daltaí féachaint leis na cártaí a chur in ord – tá dátaí ar chuid de na cártaí agus níl ar chuid eile.
- \* Anois, iarr ar na daltaí cad iad na hiarmhairtí atá láithreach/gearrthéarmach, suas go dtí deireadh na bliana 2001, a phlé. Luaitear dhá iarmhairt níos fadtéarmaí fosta mar chuid den ghníomhaíocht seo. Ba chóir go mbeadh aiseolas ranga uile ann ag an chéim seo den ghníomhaíocht.
- \* Ansin, scríobhann na daltaí ord na n-iarmhairtí san amlíne atá curtha ar fáil (Teimpléad B).
- \* Iarr ar na daltaí, ar bhonn aonair, iarmhairt amháin ionsaithe 11 Meán Fómhair a roghnú agus a mhíniú cad chuige a síleann siad gur seo an iarmhairt is tábhachtaí (Teimpléad C). D'fhéadfaí seo a chur i gcrích mar chuid de ghníomhaíocht Gach Ceann Teagasc Ceann (*Each One Teach One*).
- \* Glacann daltaí páirt i ndíospóireacht ranga uile ar thábhacht imeachtaí 11 Meán Fómhair idtaca le caidrimh idirnáisiúnta de. Cuir teimpléad ceistneora ar fáil do na daltaí (cuirfear seo ar fáil ag deireadh na háise seo) agus oibrigh tríd gach ceist. Déanann na daltaí nótaí agus tugann siad mínithe de réir mar a théann siad ar aghaidh (Teimpléad D).

## Gníomhaíocht a Ceathair

### Teimpléad A – Cártaí iarmhairtí

#### Iarmhairtí láithreacha

Thuaríteáil Eitilt 11 de chuid American Airlines go L.A., a d'fhág Bostún ar 8 a.m., isteach i dTúr Thuaidh an Ionad Tráchtála Domhanda i gCathair Nua-Eabhrac. Ar 9.03 a.m., thuaríteáil Eitilt 175 de chuid United Airlines ó Aerfort Logan i gCathair Nua-Eabhrac, isteach sa Túr Theas. Ar 8.20 a.m., d'fhág Eitilt 77 de chuid American Airlines Washington D.C. I dtrátha 10 a.m., thuaríteáil sé isteach sa taobh Thiar den Pentagon in Washington D.C.

Thuaríteáil Eitilt 93 de chuid United Airlines ó Newark, New Jersey, isteach i bpáirc in Pennsylvania i ndiaidh caismirte ar bord idir fuadaitheoirí agus paisinéirí. Bhí sí ar a bealach go San Francisco.

Maraíodh 2,977 duine sna hionsaithe, agus 19 bhfuadaitheoir san áireamh. Gortaíodh cuid mhór daoine go han-olc fosta. Fuair 343 bás idir pharaimhíochaineoir agus chomhraiceoir tine. Bhí formhór mór na ndaoine a fuair bás idir 35 agus 39 bliana d'aois. Measadh gurbh é 3,051 líon na bpáistí a chaill tuismitheoir sna hionsaithe seo agus ba é 1,609 líon na ndaoine a chaill páirtí nó céile.

Ar 11 Meán Fómhair stadadh de thaisteal in aerspás uile SAM agus Cheanada. Ordaíodh d'aerárthaigh teacht chun talaimh láithreach ag an aerfort is cóngaraí dóibh agus atreoraíodh eitleáin eile a bhí ag tarraingt ar SAM go tíortha eile i Meiriceá Theas agus sa Mhuir Chairib nó insíodh dóibh go díreach eitilt ar ais arís chun an bhaile. Lena chois seo, i SAM cuireadh gach eitilt inmheánach agus eitilt idirnáisiúnta ar ceal.

## Iarmhairtí gearrthéarmacha

Bhí tionchar ollmhór ag na hionsaithe ar gheilleagar Mheiriceá. B'éigean do stocmhargaí SA druidim go dtí 17 Meán Fómhair 2001 agus, nuair a d'oscaíl siad arís, thit Meán Tionsclaíoch Dow Jones faoi 684 pointe – an titim is mó ariamh in aon lá amháin. Chaill stoic \$1.4 trilliún dollar dá luach in 2001. Rinneadh damáiste mór don iomad gnólacht agus foirgneamh nó scriosadh iad i gCathair Nua-Eabhrac ar 9/11 (lena n-áirítear cuid mhór a bhí lonnaithe sna Túir Chúplacha féin).

### 12–14 Meán Fómhair, 2001

Sa dá lá i ndiaidh na n-ionsaithe, bhí cáineadh láithreach ann ó SAM agus ó chumhachtaí eachtracha.

D'fhógair George W. Bush go raibh SAM i gcogadh leis an sceimhlitheoireacht. Cháin Tony Blair, Príomh-Aire na RA ionsaithe 9/11. Dúirt Blair ar leithligh go seasfadh an Bhreatain 'taobh le SA' sa chath in éadan na sceimhlitheoireachta.

Sna laethanta i ndiaidh 9/11, d'fhógair mórán tíortha a ndlúthpháirtíocht le SAM, m.sh. chuir Jacques Chirac ón Fhrainc a thacaíocht in iúl agus cháin an Seansailéir Schroeder ón Ghearmáin na hionsaithe mar 'fhógairt cogaidh in éadan an domhain shibhialta.' In áiteanna eile, sna laethanta i ndiaidh na n-ionsaithe, cháin tíortha sa domhan Mhoslamach an t-uafás. Ina measc siúd bhí an Éigipt, Bairéin, an Iaráin, Cuáit, Éimin agus an Araib Shádach.

### 20–24 Meán Fómhair, 2001

Ar 20 Meán Fómhair, chum Bush go hoifigiúil an nath 'cogadh in éadan na sceimhlitheoireachta.' Imlonnaíodh trúpaí SA ar fud na hAfganastáine. Ar 20 Meán Fómhair, d'éiligh SA go dtabharfadh an Talaban Osama bin Laden ar lámh, nó go ndéanfaí ionradh orthu. D'éiligh Bush go ndéarfadh gach rialtas ar fud na cruinne cé acu bhí siad ar thaobh SAM sa chogadh nua seo in éadan na sceimhlitheoireachta, nó nach raibh. D'fhógair Putin ón Rúis a thacaíocht don chogadh in éadan na sceimhlitheoireachta ar 24 Meán Fómhair 2001. Cúpla lá ina dhiaidh sin, dúirt Musharraf ón Phacastáin go bhféadfadh SAM úsáid a bhaint as a haerbhunáiteanna le hionsaithe a lainseáil in éadan na hAfganastáine.

### 7 Deireadh Fómhair, 2001

Rinne grúpa de thrúpaí ECAT, faoi cheannas SA, ionradh ar an Afganastáin. I measc na dtíortha a bhí páirteach ann bhí Ceanada, an Ghearmáin agus an RA. Ba ghearr gur chloígh siad an Talaban ach níor maraíodh ná níor gabhadh Osama bin Laden.

## Iarmhairtí níos fadtéarmaí


Bhí méadú ar ionsaithe frith-Mhoslamacha i ndiaidh ionsaithe 9/11. I Meiriceá, dúirt an FBI (*Federal Bureau of Investigation*) go raibh méadú 1,700% ar choireanna fuatha in éadan Moslamach Meiriceánach i ndiaidh 9/11. Leanadh de stéiréitíopáil Moslamach, Arabach agus daoine ón Mheánoirthear go coitianta fada buan ina dhiaidh seo.

Chosain Cogadh na hAfganastáine (2001) agus Cogadh na hIaráice (2003) ina dhiaidh sin, na trilliúin dollar agus an iomad beatha, in éineacht le costais slándála baile i SA de \$5 trilliún ar a laghad.

# Gníomhaíocht a Ceathair

Teimpléad B – Iarmhairtí ionsaithe 11 Meán Fómhair

## Iarmhairtí láithreacha



--

--


--

## Iarmhairtí gearrthéarmacha

--

--





Empty rectangular box for text input.

Empty rectangular box for text input.

**Iarmhairtí níos fadtéarmaí**

Empty rectangular box for text input.

Empty rectangular box for text input.

## Gníomhaíocht a Ceathair

### Teimpléad C – Tascanna breise

1. Éirigh i do shaineolaí ar iarmhairt amháin ionsaithe 11 Meán Fómhair. Tabhair cuntas mionsonraithe ar d'iarmhairt don chuid eile den rang. Bí cinnte go míníonn tú a tábhacht do chaidrimh idirnáisiúnta.
2. Roghnaigh iarmhairt láithreach amháin, agus iarmhairt gearrthéarmach amháin agus iarmhairt níos fadtéarmaí amháin ionsaithe 11 Meán Fómhair. Déan taifead den iarmhairt a roghnaigh tú sa cholún ar thaobh na lámhe clé. Sa cholún ar thaobh na lámhe deise, mínigh a tábhacht do chaidreamh idirnáisiúnta.

Iarmhairt	Tábhacht do chaidrimh idirnáisiúnta
láithreach	
gearrthéarmach	
níos fadtéarmaí	


3. Mar rang, pléigh tábhacht fhoriomlán imeachtaí 11 Meán Fómhair, 2001 do chaidrimh idirnáisiúnta. Le cuidiú leat ullmhú don díospóireacht ranga, bain úsáid as an bhileog ceisteanna thíos le cuidiú leat teacht ar bhreithiúnas ar thábhacht 11 Meán Fómhair.

## Gníomhaíocht a Ceathair

**Teimpléad D – Cad é an tábhacht a bhí le himeachtaí 11 Meán Fómhair do chaidrimh idirnáisiúnta?**

Ceisteanna a bheidh ina chuidiú cinneadh a dhéanamh ar an tábhacht	Is ea nó ní hea? Cé chomh mór agus a d'aontófá leis an tuairim seo?	Nótaí
An ndeachaidh 11 Meán Fómhair i bhfeidhm ar líon mór daoine i SAM agus in áiteanna eile?		
An raibh na hiarmhairtí dearfach nó diúltach do SAM agus do chaidrimh idirnáisiúnta?		
An raibh na hiarmhairtí forleathan?		
Ar mhair na hiarmhairtí i bhfad?		
An bhfuil tábhacht le himeachtaí 11 Meán Fómhair ó thaobh ár dtuiscint ar an am atá caite?		
An bhfuil tábhacht le himeachtaí 11 Meán Fómhair ó thaobh ár dtuiscint ar an am i láthair?		
Ar athraigh tábhacht 11 Meán Fómhair le himeacht aimsire?		
Ar chúis 9/11 le hathrach tábhachtach i gcaidrimh idirnáisiúnta?		

## Gníomhaíocht Daltaí: Cúis agus Éifeacht – Caidrimh Idirnáisiúnta, 1985–2003



Cad é mar a d'athraigh caidrimh idirnáisúnta sa tréimhse 1979–2003  
agus cad chuige ar athraigh siad?

Cogadh na Sóivéidí san Afganastáin 1979–89

Deireadh an Chogaidh Fhuair agus teacht  
chun chinn ábhar nua teannais

Éifeacht ar  
chaidrimh

Gorbachev

Reagan

Titim an  
chumannachais  
agus deireadh an  
Chogaidh Fhuair

An aois nua  
coimhlinte

An '**cogadh**  
in éadan na  
sceimhlitheoireachta'

# Gníomhaíocht A Cúig

## Cleachtadh Scrúdaithe

1. Déan staidéar ar **Fhoirse A** agus freagair an cheist a leanann:

### Foirse A

**Príomh-Aire na Breataine, Tony Blair, ag caint le muintir na Breataine, Deireadh Fómhair 2001**

Thug muid le fios go soiléir i ndiaidh ionsaithe 11 Meán Fómhair ar na Stáit Aontaithe go ndéanfadh muid beart nuair ba léir cé ba chiontaí astu. Níl aon amhras ar bith ar m'intinn, nó ar intinn aon duine ar bith a léigh an fhianaise uilig atá ar fáil, gur ndearadh an líonra Al-Qaeda, faoi cheannasaíocht Osama bin Laden, na hionsaithe sin. Ná déanaimis dearmad, b'ionann ionsaithe 11 Meán Fómhair agus an t-anfhorlann sceimhlitheoireachta is measa i gcoinne mhuintir na Breataine sa stair. Is ionann dúnmharú saoránaigh de chuid na Breataine agus ionsaí ar an Bhreatain, tarlaíodh sé thar lear nó ná tarlaíodh sé. Ach fiú más rud é nach bhfuair saoránach de chuid na Breataine bás, bheadh an ceart againn beart a dhéanamh.

© BBC News

Cad é a insíonn **Foirse A** dúinn faoi fhreagairt Phríomh-Aire na Breataine ar eachtraí Mheán Fómhair 2001? (4 mharc)

2. Déan staidéar ar **Fhoirse B** agus ar **Fhoirse C** agus freagair na ceisteanna a leanann:

**Cartún le David John Eden, cartúnaí polaitíochta Meiriceánacha, ag nochtadh a thuairimí faoin 'chogadh in éadán na sceimhlitheoireachta' a foilsíodh in 2010.**



© David John Eden

## Foinse C

**Sliocht as suíomh gréasáin ar an Idirlíon a foilsíodh in 2016, ina bhfuil duine ag míniú na dtuairimí atá aige agus é ag cáineadh an ‘chogaidh in éadán na sceimhlitheoireachta’.**

Dhéanfainn an cás gur mó na téipeanna atá ag Meiriceá ina ‘chogadh in éadán na sceimhlitheoireachta’ ná a chuid buanna. Dar liom, scaipeadh gréasán Al-Qaeda mar gheall ar an chogadh san Afganastáin, agus bhí sé níos deacra arís eile iad a aimsiú dá bharr, agus mhéadaigh an frith-Mheiriceánachas i measc Mhoslamaigh an domhain mar gheall ar na hionsaithe san Afganastáin agus san Iaráic. Maíonn daoine eile a thacaíonn le mo thuairimí gurb í an mhian atá ag Meiriceá an domhan a smachtú bun agus barr lena chogadh in éadán na sceimhlitheoireachta. Agus mar chuid den domhan a smachtú, beidh taiscí ola an domhain ag Meiriceá, beidh méadú ar láithreachtaid idirnáisúnta an airm, agus ag déanamh ionsaithe ar chumhacht ar bith a chuireann ina gcoinne.

© *Encyclopædia Britannica* 2017

**Tugann Foinse B agus Foinse C dearcthaí difriúla faoin éifeacht atá ag an ‘chogadh in éadán na sceimhlitheoireachta’.**

- (a) Mínigh **dhá** dhóigh ar a n-éasaontaíonn na dearcthaí seo. (2 x 2 mharc)
- (b) Luaigh fáth **amháin** a bhfuil na dearcthaí i **bhFoinse B** agus i **bhFoinse C** difriúil. (2 mharc)

3. Déan staidéar ar **Fhoinsé D** thíos agus freagair an cheist a leanann:

## Foinse D

**Sliocht as alt nuachtán sa *New York Times*, a foilsíodh 11 Meán Fómhair, 2008.**

Ní chreideann Arabaigh sa Mheánoirthear an scéal oifigiúil faoi a tharla ar 11 Meán Fómhair 2001 agus síleann siad go raibh baint ag rialtas na Stáit Aontaithe féin leis na hionsaithe sceimhlitheoireachta. I bhfírinne i ndiaidh seacht mbliana, is é an dearcadh anseo go fóill nach dtiocfadh le Osama bin Laden agus Al-Qaeda amháin a bheith freagrach as hionsaithe 11 Meán Fómhair, 2001 agus caithfidh sé go raibh baint ag na Stáit Aontaithe leis na hionsaithe a phleanáil agus á gcur i gcrích féin. Agus amharc cad é a tharla ina dhiaidh seo-rinne na Meiriceánaigh ionradh ar dhá thír Mhoslamacha. Bhain siad úsáid as ionsaithe 11 Meán Fómhair mar leithscéal agus chuaigh siad chun cogáochta san Iaráic.

© 2007-2017 *Dissident Voice*

- (c) Cé chomh hinchreidte atá an dearcadh i **bhFoinse D** faoi ionsaithe 11 Meán Fómhair?

Mínigh do fhreagra ag baint úsáid as **Foinse D** agus as **d'eolas comhthéacsúil**.

4 Déan staidéar ar **Fhoinsí B, C agus D** arís agus freagair an cheist thíos.

Cé chomh mór agus a d'aontófa leis an tuairim i **bhFoinse D** gur bhain Meiriceá “úsáid as ionsaithe 11 Meán Fómhair agus go ndeachaigh siad chun cogáochta san Iaráic”?

I do fhreagra, **caithfidh** tú úsáid a bhaint as **Foinsí B, C agus D** agus as **eolas de do chuid féin**.

## **Roinn B – Ceisteanna samplacha**

- Cuir síos ar dhá fháth leis na hionsaithe 11 Meán Fómhair. (2 x 2 mharc)
- Cuir síos ar dhá iarmhairt ar chaidrimh idirnáisiúnta mar gheall ar an Chogadh san Iaráic. (2 x 2 mharc)

### **Cad iad na dóigheanna ar athraigh caidrimh idirnáisiúnta sa tréimhse 1979 go dtí 2003?**

- Ionradh na Sóivéidí ar an Afganastáin agus a thionchar
- Deireadh an Chogaidh Fhuair
- An aois nua Coimhlinte

### **Ceist shamplach d'aiste**

(Bain úsáid as na treoracha seo a leanas i do fhreagra. **Caithfidh** tú úsáid a bhaint as eolas de do chuid féin fosta.)